

Во Вторник 8-ой седмицы по Пасхе

В понедельник вечера

На Господи воззвах: 6 стихов: и поем стихиры подобны, глас 1-й:

Подобен: Небесных чинов:

Ныне обновляются языцы величии Божиими, иновещанными словесы, яко в виде огненном, во уверение всех сущих на земли, поведати яснейши, ныне знамение языком воистинну спасение пришел еси.

Юже низпослати обещал еси учеником Твоим Христе с высоты силу, исполнивый, посылаеши Святаго Твоего Духа, показавый нам, яко Ты еси истина, и на тя уповаующии блаже, воистинну не посрамляются.

Предъобещание Исполниый, Твоего Утешителя, яко во огненных языцех послал еси миру, всех грехи божественным огнем сляти, и дати нам еже к нему общение истинное, верно богословящим его.

И Минен, 3. Слава, и ныне: глас 1-й:

Пятдесятницу празднуем, и Духа пришествие, и предложение обещания, и надежды исполнение, и таинство елико, яко велико же и честно. Темже вопием Ти: Содетелю всех, Господи, слава Тебе.

На стиховне стихиры, глас 2-й:

Подобен: Доме Евфрафов:

Делом учеником, * якоже обещал еси * слове, послал еси * божественного и Святаго Твоего Духа, * и сия просветил еси.

Стих: Сердце чисто созижди во мне, Боже, и дух прав обнови во утробе моей.

Внезапу с небесе * апостолы вся * божественного Утешителя * сила, всемудры * и богословны показа.

Стих: Не отвержи мене от лица Твоего, и Духа Твоего Святаго не отыми от мене.

Род инородных, * слышаще * недоумевавхуся, * языки своими, божественныя апостолы, * Троицу величающыя.

Слава, и ныне: глас 1-й:

Языками инородных обновил еси Христе, Твоя ученики, да теми Ты проповедят безсмертнаго Слова и Бога, подающаго душам нашим велию милость.

Ныне отпускаеши: **Т**рисвятое. По **О**тче наш.

Тропарь праздника, глас 8-й:

Благословен еси Христе Боже наш, Иже премудры ловцы явлей, низпослав им Духа Святаго, и теми уловлей вселенную, Человеколюбче слава Тебе.

[Слава: святаго, аще имать. И ныне: празднику]

И отпуст

Во Вторник 8-й седмицы по Пасхе На Утрени

На Бог Господь: тропарь праздника глас 8-й:

Благословен еси Христе Боже наш, Иже премудры ловцы явлей, низпослав им Духа Святаго, и теми уловлей вселенную, Человеколюбче слава Тебе. [Дважды.]

[Слава: святаго, аще имать. И ныне: празднику]

По 1-м стихословии седален, глас 1-й:

Подобен: Гроб твой:

Счиняю, своспеваю, сславлю, спочитаю Отцу и Сыну Духа Всесвятаго, соединяя божеством, разделяя свойства: сице бо сей Христовы Апостолы ныне одеяв, во всем мире проповедати упремудри.

Слава, и ныне: тойже.

По 2-м стихословии седален, глас 4-й:

Подобен: Скоро предвари:

Христовы ученики Духа благодать, страшно с небесе сошедши в виде огненном, просвети, и светильники показа возвещающыя Святыя Троицы едину силу, и господство едино, еже верою славим.

Слава, и ныне: тойже.

Псалом 50. И канон праздника 7-го гласа, со ирмосы на 8: и минеи на 4. Кондак, и ексапостиларий праздника.

Песнь 1. Глас 7-й:

Ирмос: Понтом покры фараона с колесницами сокрушая брани мышцею высокою, поим Ему, яко прославися.

Делом, якоже древле учеником обещал еси, Утешителя Духа пославыи Христе, возсиял еси миру свет Человеколюбче.

Законом древле проповеданное и пророки, исполнися: Божественнаго бо Духа днесь всем верным благодать излиися.

И минеи на 4.

Катавасия: Божественным покровен ...,

Песнь 3.

Ирмос: С высоты силою, учеником Христе, дондеже облецетесь, рекл еси, сядите во Иерусалиме: Аз же яко Мене, Утешителя иного, Духа Моего же и Отча пошлю, в Немже утвердитесь.

Божественнаго Духа нашедшая сила, раздельшийся древле глас, зле согласившихся, во едино приличие божественне совокупн, ведением Троицы вразумляющи верныя, в Нейже утвердихомся.

И минеи на 4.

Катавасия: Разверзе утробы ...,

Кондак святого минеи, и икос, и седален его.

Слава, и ныне: седален, глас 8-й:

Подобен: Повеленное тайно:

Спасовы рачительные радости исполнишася, и дерзновение прияша, прежде боящихся: яко Дух Святыи днесь свыше сниде на дом ученический, и ин иная глаголаше к людем. Языцы бо разсеяшася, видими яко огнь: и сих не опали, но паче ороси.

Песнь 4.

Ирмос: Смотриай пророк в последняя Твое Христе пришествие, вопияше: Твою услышах Господи силу, яко вся спасти помазанныя Твоя пришел еси.

Во пророцех глаголавый, и законом проповеданный первее несовершенным, Бог Истинный Утешитель, Слова служителем и свидетелем познавается днесь.

Знамение Божества носяй, апостолом во огни, Дух разделися, и странными языки являшеся, яко Отческая Божественная сила грядущая есть, самоповелительная.

И минеи на 4.

Катавасия: Царю царей ...,

Песнь 5.

Ирмос: Страха ради Твоего зачатый Господи во чреве пророков, и рожденный на земли Дух спасения, апостольская сердца созидает чиста, и в верных правый обновляется: свет бо и мир зане Твоя повеления.

Нашедшая сила днесь сия, Дух Благий, Дух премудрости Божия, дух от Отца исходяй, и Сыном верным нам явлейся подавателен, в нихже вселяется естеством святости, в нейже зрится.

И минеи на 4.

Катавасия: Решительное очищение ...,

Песнь 6.

Ирмос: Плавающего в молве житейских попечений, с кораблем потопляема грехи, и душетленному зверю приметаема, яко Иона Христе, вопию Ти: из смертоносныя глубины возведи мя.

От Духа Твоего на плоть всякую, якоже рекл еси, богато излиал еси, и исполнишася всяческая Твоего ведения, Господи, яко из Отца Сын нетленно родился еси, и Дух нераздельный изыде.

И минеи на 4.

Катавасия: Очищение нам ...,

Кондак, глас 8-й:

Егда снизшед языки слия, разделяше языки Вышний: егда же огненные языки раздаяше, в соединение вся призва, и согласно славим Всесвятаго Духа.

Икос: Скорое и известное даждь утешение рабом Твоим Иисусе, внегда унывати духом нашим, не разлучайся от душ наших в скорбех, не удаляйся от мыслей наших во обстояниях: но присно нас предвари. Приблизися нам, приблизися везде Сый, якоже со апостолы Твоими всегда еси, сице и Тебе желающим соедини Себе Щедре: да совокуплени Тебе поем, и славословим Всесвятаго Духа Твоего.

Песнь 7.

Ирмос: В пещь огненную ввержени преподобнии отроцы, огонь в росу преложиша, воспеванием сице вопиюще: благословен еси Господи Боже отец наших.

Ветующим Божественная величия апостолом, Духа действо непщевашеся пьянство неверствующим, имже Троица познавается, един Бог отец наших.

Нераздельное естество православно богословим Бога Отца Безначальнаго, тояжде власти Слова и Духа, благословен еси, зовуще, Боже отец наших.

И минеи на 4.

Катавасия: Согласная возпшуме ...,

Песнь 8.

Ирмос: Неопальная огню в Синаи причащаяся купина, Бога яви медленоязычному и гугнивому Моисеови, и отроки ревность Божия три неупорядоченныя во огни певцы показа: вся дела Господня Господа пойте, и превозносите во вся веки.

Животну свыше бурну носиму гласовне, Духа Всесвятаго дыханию рыбарем, огненных видом язык величия Божия ветийствовашу: вся дела Господа пойте, и превозносите во вся веки.

Яко на некасаемую превосходяще гору, не боящися огня страшаща, приидите и станем на горе Сионской, во граде Живаго Бога, духоносным учеником ныне сликующе: вся дела Господа пойте, и превозносите во вся веки.

И минеи на 4.

Катавасия: Разрешает узы ...,

Поем Честнейшую:

Песнь 9.

Ирмос: Не тления искушением рождаемая, и Всехитрецу Слову плоть издававшая, Мати Неискусомужная Дево Богородице, приятелище Нестерпимаго, село Невместимаго Зиждителя Твоего, Тя величаем.

На палящей древле огненной колеснице, ревнитель и огнедохновенный радуясь носимъ, еже ныне возсиявшее дохновение свыше апостолом являше: от негоже освятившися, Троицу всем сказахъ.

Закон естеств кроме, странное слышашеся учеников: единому бо гласу гласящу Духа благодатию, различне оглашахуся людие, племена и языки божественная величия, Троицы ведению научающе.

И минеи на 4.

Катавасия: Радуйся Царице ...,

Ексапостиларий праздника.

Подобен: Небо звездами:

Всесвятый Душе, исходяй из Отца и Сыном пришедый к безкнижным учеником, Тебе Бога познавших спаси и помилуй всех.

Слава: святаго, аще есть: аще ли ни,

Слава, и ныне: праздника

На хвалитех поставим стихи минеи, аще есть:

Таже: Слава Тебе показавшему нам свет:

И ектения: Исполним утреннюю молитву нашу:

На стиховне стихиры, глас 2-й:

Подобен: Доме Евфрафов:

Зарю богонаначальною * ум просветивше, * ученицы Твои, * Слове, существенно * Духа Святаго прияша.

Стих: Сердце чисто созижди во мне Боже, и Дух Прав обнови во утробе моей.

Языцы со огнем, * с высоты * видими бывше, * на апостолы снидоша, разделяеми, * просвещающе, не опаляюще.

Стих: Не отвержи мене от лица Твоего, и Духа Твоего Святаго не отими от мене.

Свыше к нам * Утешителю пришед, * яко прежде Апостолом, * освяти и спаси, * Тя Бога проповедающия.

Слава и ныне: глас 1-й:

Вся подает Дух Святой, точит пророчества, священники совершает, некнижные мудрости научи, рыбаи богословцы показа, весь собирает собор церковный: единосущне и сопостольне Отцу и Сыну, Утешителю слава Тебе.

Таже, Благо есть исповедатися Господеву

Трисвятое. И по Отче наш:

Тропарь праздника, глас 8-й:

Благословен еси Христе Боже наш, Иже премудры ловцы явлей, низпослав им Духа Святаго, и теми уловлей вселенную, Человеколюбче слава Тебе.

Таже ектенія: Помилуй нас Боже: Час 1. И отпуст.

Во Вторник 8-й седмицы по Пасхе На Литургии

Блаженна от канона праздника, обоих творцов песнь 1-я, на 6.

Делом, якоже древле учеником обещал еси, Утешителя Духа пославый Христе, возсиял еси миру свет Человеколюбче. [Дважды.]

Законом древле проповеданное и пророки, исполнися: Божественного бо Духа днесь всем верным благодать излиися.

Рекоша чистая и честная уста: разлучения вам не будет, о друзи! Аз бо на Отчем вышнем престоле соседя, излию Духа, возсияти желающим благодать независтную.

Слава: Рекоша чистая и честная уста: разлучения вам не будет, о друзи! Аз бо на Отчем вышнем престоле соседя, излию Духа, возсияти желающим благодать независтную.

И ныне: Предел прешедшее истиннейшее Слово, тихообразно совершает сердце: дело бо скончав, возвесели друзи, дыханием нужным и огненными языки, подав Духа Христос, якоже обещася.

По входе тропарь праздника, глас 8-й:

Благословен еси Христе Боже наш, иже премудры ловцы явлей, низпослав им духа святого, и теми уловлей вселенную, Человеколюбче слава Тебе.

И храма святого: И тропарь святого, аще есть, таже кондак храма. Слава: кондак святого.

И ныне: кондак праздника, глас 8-й:

Егда снизшед языки слия, разделяше языки вышний: егда же огненные языки раздаяше, в соединение вся призва, и согласно славим всесвятого Духа.

Прокимен, глас 8-й: Во всю землю изыде вещание их, и в концы вселенныя глаголы их. [И до отдания.]

Стих: Небеса поведают славу Божию, творение же руку Его возвещает твердь.

К Римляном Послание, зачало 79: (Рим. 1:1-7, 13-17)

Павел, раб Иисус Христов, зван Апостол, избран в благовестие Божие, еже прежде обеща пророки Своими в писаниих святых, о Сыне Своем, бывшем от семени Давидова по плоти, нареченном Сыне Божии в силе, по духу святыни, из воскресения от мертвых, Иисуса Христа Господа нашего, Имже прияхом благодать и апостольство в послушание веры во всех языцех, о имени Его. В нихже есте и вы, звани Иисусу Христу. Всем сущим в Риме возлюбленным Богу, званным святым. Благодать вам и мир от Бога Отца нашего, и Господа Иисуса Христа. Не хочу же не вести вам, братие, яко множицею восхотех приити к

вам, и возбранен бых доселе, да некий плод имею и в вас, якоже и в прочих языцех. Еллином же и варваром, мудрым же и неразумным должен есмь. Тако есть, еже по моему усердию и вам сущим в Риме благовестити. Не стыжуся бо благовествованием Христовым: сила бо Божия есть во спасение всякому верующему, Иудею же прежде и Еллину. Правда бо Божия в нем является от веры в веру, якоже есть писано. Праведный же от веры жив будет.

Аллилуиа, глас 1-й: Словом Господним небеса утвердишася, и Духом уст Его вся сила их.

Стих: С небесе призре Господь, виде вся сыны человеческия.

Евангелие от Матфея, зачало 10: (Мат. 4:25-5:13)

Во время оно, по Иисусе идоша народи мнози от Галилеи и десяти град, и от Иерусалима и Иудей, и со онаго полу Иордана. Узрев же народы, взыде на гору, и седшу Ему, приступиша к Нему ученицы Его. И отверз уста Своя, учаще их, глаголя: блажени нищии духом, яко тех есть Царствие Небесное. Блажени плачущии, яко тии утешатся. Блажени кротцыи, яко тии наследят землю. Блажени алчущии и жаждущии правды, яко тии насытятся. Блажени милостивии, яко тии помиловани будут. Блажени честии сердцем, яко тии Бога узрят. Блажени миротворцы, яко тии сынове Божии нарекутся. Блажени изгнани правды ради, яко тех есть Царствие Небесное. Блажени есте, егда поносят вам, и ижденут, и рекут всяк зол глагол на вы лжуще, Мене ради. Радуйтеся и веселитесь, яко мзда ваша многа на небесех, тако бо изгнаша пророки, иже беша прежде вас. Вы есте соль земли, аще же соль обуюет, чим осолится? Ни во чтоже будет ктому, точию да изсыпана будет вон и попираема человеки.

За Достойно: поем и до отдания ирмос:

Ирмос: Радуйся Царице, матередевственная славо: всяка бо удобообращательная благоглаголивая уста витийствовати не могут, Тебе пети достойно: низумевает же ум всяк Твое Рождество разумети. Темже Тя согласно славим.

Причастный: Дух Твой Благий наставит мя на землю праву.
Аллилуиа. [Трижды.]

И по отпусте на литургии глаголется 9-й час по обычаю.